

Herremättli-Clique 1988

Sujet:

D'Affejagd ze Basel

Ai Schimpans het dr ander gfroggt:
"Findsch au, me syg im Keefig bloggt?
Gschpyrsch ebben au e bitz am Hinter
's wurd ehnder Friehlig anstatt Winter?
Git Dir dr Feehn au däwäg z'schaffe?"
Do sait dr ander allnen Affe:
"Lueg numme, wie sich alli luuse,
am Fidle kratze und dien schmuuse,
wie dert dr ältschti Aff sich schittlet
und brinschtig an dr Dire rittlet.
Jetzt springt sy uff, will d'Schloss nimm schliesse!
Hopp, loos, in d'Schtadt, go d'Peep Show gniesse!"

Die ganzi Bandi drollt drvoo,
haut's furt vom Zolli (hoochdytsch "Zoo");
de gsehsch sy gege d'Schtaine zäpfe,
zu ihresglychen und zu Schnäpfe
und gar kaim Bebbi, kaim Kamuff,
fallt irgend ebbis bsunders uff.
"Isch das ächt", frooge sich d'Passante,
"e neje Schub vo Asylante?"
Dr grossi Menschekenner Thedy
behauptet, 's syge Mini-Yeti,
doch wär sich d'Mieh nimmt, gnauer z'gaffe,
het pletzlig gmerggt: "Das sin jo Äffe!"

Kuum het dr Mensch e blassi Ahnig,
keyt är in Schreykrämpf und in Panik
und anstatt d'Zolliwärter z'hole,
verschteggd me sich in Birsigdoole.
Dr Migger druggt sich hinter's Trudy,
(de gsehsch en nimm, dangg ihrem Fudi).
D'Frau Merian, mit starrer Myne,
hipft - schwupps - ins Männer-WC yne,
dr Hueber Dölf macht voller Rasse
e Syttesprung in d'Kinokasse,
d'Frau Sarasin keyt uff dr Ranze -
und alles wäge de Schimpanse!

S benimmt sich alles däwäg bschisse,
als wäre sy vo Affe bisse.
do maint ai Schimpans: "S'isch famoos!
Ich bi als Aff nit halb so gross,
und d'Mensche maine, ich syg doof.
Jetzt dien sy bleeder als e Schoof,
und jede vo de dopplet grosse
het jetz e Schtinggi in de Hoose,
mir kennte glaub, wenn mir meh schreye,
au jedi Demo schnäll zerschtreje,
doch, wämmer wette: S jetzig Gschrey
riefft sicher noo dr Bolizey?"

Es isch esoo! D'Safari kunnt!
Mit KnippeL, MP, Netz und Hund,
mit Dränegas und Spritzwaage
mit Helm und Schild - und Drugg im Maage.
und im Kommandowaage - bieder -
hoggt stahlverschantz dr Kari Schnyder.
Ai Schimpans grinst: "My liebe Kari,
sytt wenn beglaitet Di d'Safari,
wenn Du in d'Schtaine gohst go jage?
Syt wenn bruuchsch Du e Panzerwaage,
massiv verschterggt an alle Kante?
Verkehrt me däwäg mit Verwandte?"

Dr Kari, trotz no vyle Hoor.
het laider nit so vyl Humor.
Im Gegeedail, sy Strategie
haisst: "Fanget d'Affe, meeglisch gly,
in eyre digge Panzerkittel
und zwor mit aff-erprobte Mittel.
Hopp - Männer - vorwärts, uff in Kampf -
mit Hurraschrey und Pulverdampf,
mit Panzerfuscht und Gloggeglyt
wie by Sanggt Jakob synerzyt.
Und sott ain ebbe miesse schiesse,
denn schonet eyri Dränedriese."

Drotz Ibermuet und purem Frohsinn,
hän d'Affe, wo nit halb so gross sin,
dr Ibermacht im grosse ganze
nimm uf dr Nase kenne danze.
Drum sait dr Schimpans A zem zwaite:
"I glaub, mer griege Schwirigkaite,
doch mecht y, vor mer ganz uffschtegge,
no kurz e Schuggerli go negge.
Waisch wär y main? Lueg sälle Schroter!
Dert, hinter sällem Schroter stoht er!"
Denn haut är ab und gumpt vo hinte
däm gschoggte "Rambo zwai" uff d'Flinte!

Was hättsch Du gmacht? Wärsch au verschrogge?
Mainsch, wäre Dyni Hoose drogge?
Du bisch nadyrlig nit wie jede,
Du hättsch gluegt, mit däm Schimpans z'rede,
denn miesst är nit in Himmel schwäbe
und kennt no freehlig wyterläbe.
Du waisch genau, wie alles goht,
und, ass Di jeden Aff verschtoht!
"Du hättsch doch solle - nai Du hättsch..."
so lutet hitte 's maischti G'rätsch.
Au d'Affeflucht zaigt ohni Mieh:
Mach's wie de wottscht rächt isch es nie!